



ESTATUTU

ALUMNI

PARLAMENTU FOINSA'E

TIMÓR-LESTE

APFTL

“Kari fini diak ba foinsa'e sira”

PREÁMBULU

Repúblika Demokrátika Timór-Leste nia independensia hanesan fundasaun ida hodi hatur metin foinsa'e Timoroan tomak nia mehi atu dezenvolve nia-an hodi dignifika nudar futuru ba nasaun ukun rasik-an iha mundu raiklaran. Hanesan nasaun independente, foinsa'e Timoroan iha obrigasaun hodi hola parte iha prosesu dezenvolvimentu iha setor hotu-hotu hodi tau as direitus humanus sidadaun ida-idak nian no direitu fundamental sira seluk ne'ebé konsagra ona iha Konstituisaun Repúblika Demokrátika Timór-Leste.

Alumni Parlamentu Foinsa'e Timór-Leste nu'udar organizasaun ne'ebé mahon ba Eis-Parlamentu Foinsa'e Nian hodi halibur ideia sira no asaun ba dezenvolvimentu rai ida ne'e nian, nune bele lori foinsa'e sira-ne'ebé rezilente, vizionariu, demokrátiku no sivilizadu.

Atu hakat ba objektivu komum ne'ebé determinadu, Alumni Parlamentu Foinsa'e Timór-Leste hanesan deklarasaun universal ida hodi hatudu komitmentu, dedikasaun no sakrifisiu ho espiritu **Voluntarismu, Ativismu no Sivismu** ne'ebé iha hanoin no asaun ba foinsa'e tomak nia moris diak ohin no ba aban bain rua.

KAPITULU I
NARAN, DATA HARI'I NO FATIN

Artigu 1.º

Naran no data hari'i

1. Organizasaun ida ne'e hanaran Alumni Parlamentu Foinsa'e Timór-leste, habadak APFTL;
2. APFTL hari'i iha Díli husi Eis-Parlamentu Foinsa'e Nian tomak ne'ebé iha rai-laran no mós iha rai-liur, iha loron 26 fulan Agustu tinan 2015.

Artigu 2.º

Fatin

Fatin Organizasaun Alumni Parlamentu Foinsa'e Timór-Leste iha Kapital Dili, Timór-Leste.

KAPITULU II
NATUREZA, PRINSIPIU NO VALORE SIRA

Artigu 3.º

Natureza

1. Alumni Parlamentu Foinsa'e Timór-Leste hanesan Organizasaun ne'ebé mahon ba Eis-Parlamentu Foinsa'e Nian;
2. Alumni Parlamentu Foinsa'e Timór-Leste hari'i kaer metin ba demokrásia, solidarriu, inisiativu no mutu konsensu.

Artigu 4.º

Prinsipiu

1. Alumni Parlamentu Foinsa'e Timór-Leste ho nia prinsipiu indepedenti, apartidáriu, partisipativu, igualidade hodi koordena foinsa'e sira nia hanoin nune'e kontribui ba dezvoltimentu nasional.
 - a) Partisipasaun demokrasia, membru hotu-hotu iha direitu partisipa iha vida organizasaun liu-liu hili ka sai kandidatu ba estrutura APFTL nian;

-
- b) Igualdade, membru hotu-hotu iha dignidade hanesan no la iha membru ida bele previlijiadu ka prejudikadu ho razaun asedensia, sexu, rasa, lian, orijen, relijiaun, konviksaun politika ka ideolójika, situasaun ekonómiku ka kondisaun sosial.
 - c) Membru hotu-hotu iha espíritu Voluntarismu, Ativismu, Sivismu, solidariedade no sakrifika-an ba partisipasaun reuniaun no/ka aktividade APFTL nian.

Artigu 5.º

Valor sira

Alumni Parlamentu Foinsa'e Timór-Leste kaer metin ba valor no prinsipiu Voluntarismu, Ativismu no Sivismu ne'ebé iha hanoin no asaun ba foinsa'e sira nia moris diak, nune'e mós kaer metin ba prinsipiu sira seluk ne'ebé vigóra iha Konstituisaun RDTL no normas seluk ne'ebé eziste iha Timór-Leste.

KAPITULU III

LEMA, SIMBOLU NO INU

Artigo 6.º

Lema

Alumni Parlamentu Foinsa'e Timór-Leste nia Lema mak **“Kari fini diak ba foinsa'e sira”**.

Artigo 7.º

Simbolu

1. Simbolu Alumni Parlamentu Foinsa'e Timór-Leste mak sirkulu ida ne'ebé iha laran, iha mapa Timór, fitun, triangulu ne'ebé ho nia sentidu katak Alumni Parlamentu Foinsa'e Timór-Leste iha espíritu Voluntarismu, Ativismu no Sivismu hodi garante unidade, solidariedade, inisiativu no kreatividade hodi servi no defende foinsa'e nia direitu, devere sira-ne'ebé deklara iha baze legal sira.
2. Simbolu ida ne'e kompostu husi kor:
 - a) Mutin : Paz
 - b) Kinur : Krítiku

-
- c) Mean : Aten Brani no Responsabilidade
 - d) Azul : Unidade
 - e) Matak : Buras
3. Simbolu ida ne'e kompostu husi grafiku.
- a) Sirkulu : Unidade, Koperativu no Organizado;
 - b) Triangulu : Hotu-hotu hanoin ba ida deit mak Liberdade no Justisa Iha Timór-Leste;
 - c) Mapa Timór : Rai ida ne'ebé mak ita hotu hadomi;
 - d) Fitun : Hanesan Matadalan Ba Alumni Parlamentu Foinsa'e Timór-Leste.

Artigu 8.º

Inu

Inu Alumni Parlamentu Foinsa'e Timór-Leste nian Marxa APFTL

KAPITULU IV

VIZAUN, MISAUN NO OBJETIVU

Artigu 9.º

Vizaun

Alumni Parlamentu Foinsa'e Timór-Leste (APFTL) nia vizaun mak **“Juventude Autor ba Dezenvolvimentu Sustentavel, Siviku, Solidariu, Justu no Orgullu nudar Timoroan”**

Artigu 10.º

Misaun

Alumni Parlamentu Foinsa'e Timór-Leste (APFTL) nia misaun mak :

1. Dizamina no sensibiliza informasaun positivu ba foinsa'e Timoroan nia moris diak;
2. Motiva no forma foinsa'e sira;
3. Promove partisipasaun foinsa'e iha moris sosiedade.

Artigo 11.º

Objektivu

1. Promove, proteje no enkoraja foinsa'e sira liu husi Edukasaun Sivika hodi hala'o sira nia direitu ho devere sira hanesan sidadaun ida ne'ebé iha responsabilidade;
2. Hamutuk ho foinsa'e konstrui paz no unidade iha Timór-Leste hodi kontribui ba dezvoltimentu nasional;
3. Parseria ho Instituisaun Estadu, Governu, Agencia Nasional no Internasional inklu Sociedade Sivil sira hodi kontribui ba dezvoltimentu nasional;
4. Promove no prepara foinsa'e sira ba fututu lideransa nasaun Timór-Leste.

KAPITULU V

MEMBRU NIA DIRETU NO DEVER

Artigo 12.º

Membru

1. Membru Alumni Parlamentu Foinsa'e Timór-Leste ne'e kompostu husi Eis-Membru Parlamentu Foinsa'e Nian.

Artigo 13.º

Direitu sira

1. Direitu Membru nian.
 - a) Direitu ba hili no eleitu ba kargu iha APFTL nian ne'ebé hatur iha alinea a), b), no c) n° 1 artigu 15.º;
 - b) Direitu asesu informasaun;
 - c) Direitu hato'o opiniaun no sejestau;
 - d) Direitu partisipa iha eventu nasional no internasional tuir prosesu legal.

Artigo 14.º

Dever sira

1. Dever membru nian.
 - a) Kumpri Estatutu no regulamentu APFTL nian no halo tuir desizaun koletiva sira ne'ebé hasai husi Estrutura Ezekutivu APFTL;
 - b) Membru hotu-hotu iha dever atu ezekuta aktividade ne'ebé organizasaun planea ona tuir Planu Strategia no Planu Anual Organizasaun nian.

KAPITULU VI

ESTRUTURA

Artigo 15.º

Estrutura

1. Estrutura Alumni Parlamentu Foinisa'e Timór-Leste kompostu husi:
 - a) Korpu Reuniaun Jeral;
 - b) Korpu Ezekutivu;
 - c) Korpu Fiskal.

Artigo 16.º

Natureza no konvokatoriu

1. Kongresu mak orgaun a'as liu desizaun nian iha APFTL no konstitui husi membru hotu-hotu ne'ebé hatur n.º 1 artigu 12.º Estatutu ne'e;
2. Korpu Reuniaun Jeral mak iha direitu konvoka kongresu ne'ebé hala'o tinan lima dala ida;
3. Membru sira ne'ebé temi ona iha n.º 1 artigu 12.º iha direitu votu no kandidata-an;
4. La iha membru ida reprejenta membru seluk iha Kongresu.

Artigo 17.º

Asembleia jeral anual

Reuniaun Asembleia Jeral akontese kada tinan ida dala ida ne'ebé partisipa husi membru hotu ne'ebé lidera husi Korpu Reuniaun Jeral.

Artigo 18.º

Kompozisaun no eleisaun Korpu Reuniaun Jeral

Korpu Reuniaun Jeral (KRJ) kompostu husi Prezidente ida, Vice-Prezidente ida no Sekretariu ida ne'ebé hili tinan lima dala ida iha Kongresu.

Artigo 19.º

Kompetensia KRJ

Kompetensia ba KRJ:

1. Simu informasaun hotu-hotu kona-ba jestaun organizasaun nian husi Korpu Ezekutivu;
2. Apresia relatoriu aktividade no orsamentu Korpu Ezekutivu nian, fo pareser no apresenta iha Reunian Asembleia Jeral Anual (AJA), kazu pareser (*feedback*) mak hetan iregularidade grave sei regula tuir artigu 23º;
3. Avalia programa ba organizasaun;
4. Diskute no aprova planu aktividade anual ba Korpu Ezekutivu;
5. Husu konvokasaun reuniaun extraordinariu kona-ba asuntu ne'ebé nesesito kompetensia sira nian hanesan: demisaun, komete krime, konflitu interna no mate;
6. Garante implementasaun Estatutu.

Artigo 20.º

Korpu Ezekutivu

Natureza, Eleisaun no Kompozisaun

1. Korpu Ezekutivu mak korpu ezekutador APFTL nian;
2. Korpu Ezekutivu hili tinan lima dala ida ho votu maioria simples;
3. Korpu Ezekutivu kompostu husi pesoal nain lima (5) mak:
 - a) Prezidente 1;
 - b) Vice-Prezidenten 1;

-
- c) Sekretariun 2;
 - d) Finansa 1.
4. Korpu Ezekutivu nia departementu ka seksaun regula iha regulamentu interna.

Artigu 21.º

Reuniaun Korpu Ezekutivu

1. Korpu Ezekutivu reune fulan ida dala ida;
2. Korpu Ezekutivu reune iha reuniaun extraordinaria kuandu:
 - a) Inisiativa husi Presidente;
 - b) Proposta husi membru maioria;
 - c) Pedidu husi KRJ wainhira iha relasaun ho asuntu ne'ebé kompetente.
3. Korpu Ezekutivu bele autoriza ka konvida ema ruma partisipa iha reuniaun, maibe la iha direitu foti disizaun.

Artigu 22.º

Korum

1. Korpu Ezekutivu so bele halo reuniaun kuandu nia membru sira prezensa liu metade no disizaun sira hasai ho maioria simples;
2. Kuandu empata iha votasaun, Prezidente iha votu kualidade;
3. Kada reuniaun hakerek iha akta no asina husi membru hotu ne'ebé prezensa.

Artigu 23.º

Responsabilidade

1. Membru Korpu Ezekutivu hotu-hotu iha responsabilidade bo'ot ba ezelesaun orsamentu no gestaun administrasaun;
2. Kada membru Korpu Ezekutivu iha responsabilidade individual/hamutuk wainhira komete kazu sivil/kriminal, krime finanseiru, no asaun/pratika sira ne'ebé latuir Estatutu sei prosesa tuir normas no lei sira ne'ebé vigóra iha Timór-Leste.

Artigu 24.º

Kompetensia Korpu Ezekutivu

Kompetensia ba Korpu Ezekutivu:

- a) Kumpri Estatutu no hala'õ knar tuir visaun, misaun no objetivu ne'ebé hatur iha Estatutu ne'e;
- b) Kumpri disizaun sira ne'ebé hasai husi Reuniaun Assembleia Jeral Anual;
- c) Halo dinamizasaun iha organizasaun no diriije APFTL;
- d) Elabora relatoriu aktividade anual no finansa ba Reuniau AJA;
- e) Publika no distribui dokumentu sira importante antes tama ba Reuniaun AJA nian;
- f) Kria departamentu no seksaun sira tuir nesesidade Korpu Ezekutivu nian.

Artigu 25.º

Kompetensia estrutura Korpu Ezekutivu

1. Kompetensia Prezidente Korpu Ezekutivu:

- a) Reprezenta APFTL iha rai-laran no mos iha rai-liur;
- b) Ezekuta desizaun sira hasai husi Korpu Ezekutivu;
- c) Konvoka no prezide reunian Korpu Ezekutivu;
- d) Asina dokumentu hotu hasai husi reuniaun Korpu Ezekutivu;
- e) Asina no sertifika korespondensia organizasaun nian;
- f) Prezidente Korpu Ezekutivu bele delega ninia kompetensia ba kualker membru Korpu Ezekutivu;

2. Kompetensia Vise-Prezidente Exekutivu

Kompetensia ba Vise-Prezidente mak koadjuva Prezidente nia funsaun wainhira presidente la iha fatin no koordena aktividade sira iha departementu ka seksaun sira iha ninia responsabilidade.

3. Kompetensia Sekretariu/a

- a) Prepara no asegura dokumentus administrativu;
- b) Sekretariu sira hamutuk ho prezidente prepara planu asaun;
- c) Sertifika planu husi seksaun sira antes hetan aprovasaun husi Presidente Ezekutivu;
- d) Hakerek no asina akta reuniaun Korpu Ezekutivu nian;
- e) Prepara ajenda reuniaun Korpu Ezekutivu hamutuk ho Presidente.

4. Kompetensia Finansa

- a) Prepara planu orsamentu;
- b) Simu no konta kontribuisaun finanseiru husi membru ka duador ruma;
- c) Elabora relatoriu reseita no despeza ba presidente hodi apresenta relatoriu orsamentu iha Reuniau AJA;
- d) Konserva no responsabiliza dokumentu hotu ne'ebé iha relasaun ho orsamentu;
- e) Asina hamutuk ho Presidente dokumentu ne'ebé relasiona ho orsamentu.

Artigo 26.º

Korpu fiskal

1. Korpu Fiskal kompostu husi ema nain 4 mak: Presidente 1, Vise 1 no Sekretaria 2 ne'ebé hili tinan lima dala ida iha kongresu;
2. Korpu ida ne'e maka iha kompetensia atu halo fiskalizaun ba programa organizasaun nian ne'ebe implementa husi Korpu Ezekutivu:
 - a) Halo auditoriu interna iha organizasaun;
 - b) Fiskaliza no monitoriza aktividade Korpu Ezekutivu nian.

KAPITULU VII

MANDATU, DEMISAUN NO REUNIAUN REGULAR

Artigo 27.º

Mandatu

1. Mandatu ba Presidente Korpu Estrutura APFTL husi KRJ, Korpu Ezekutivu no Korpu Fiskal durante tinan lima (5) no bele kandidata fila-fali ba periodu ida tan;
2. Bainhira korpu estrutura APFTL nia mandatu remata, propriedade organizasaun nian sei entrega ba estrutura foun.

Artigo 28.º

Demisaun titular sira

1. Estrutura APFTL nia mandatu remata bainhira:
 - a. Estrutura foun APFTL eleitu ka simu toma de pose liu husi Kongresu;
 - b. Bainhira titular ida husu demisaun ka mate sei hala'o reniaun extraordinaria hodi substitui;
 - c. Bainhira titular ida akuzadu lolos ba krime ne'ebé bele simu kastigu iha kadeia tenke para halao nia servisu.

Artigo 29.º

Reuniaun regular

1. Reuniaun regular sei halao ho objektivu atu debate asuntu tékniku no estratéjiku ne'ebé iha natureza urjente ka emerjensia;
2. Halo avaliasaun ba atividade ne'ebé hala'o tiha ona.

KAPITULU VIII

ELEISAUN ESTRUTURA

Artigo 30.º

Prosesu eleisaun

1. Eleisaun sei hala'o tinan lima dala ida ho forma direita, sekretu, livre, justu no nakloke ba delegadu sira iha Kongresu;
2. Eleisaun ne'e hodi forma estrutura foun APFTL;
3. Delegadu hotu ne'ebé partisipa iha kongresu ne'e iha direitu hodi hili no ema hili ba estrutura APFTL ne'ebé refere iha alinea a), b) no c) n.º 1 artigo 15.º;
4. Kandidatura sira organiza tuir lista ka pakote ne'ebé koresponde ba estrututura hotu iha APFTL nian.
5. Se iha violasaun ba no. 1 no 4 iha leten prosesu ne'e invalida ka nulu.
6. Kazu iha destituisaun ba prosesu kandidatura akontese, membru pakote substitui fali ema seluk hodi submete ba meza.

Artigu 31.º

Prinsipiu igualdade no oportunidade kandidatura

Delegadu hotu-hotu iha direitu no oportunidade hanesan kandidata-an liu husi lista kandidatura ba estrutura APFTL nian.

Artigu 32.º

Prinsipiu neutralidade no imparcialidade

1. La iha individu ka grupu ka Meza influensia direita ka indireta ba lista kandidatura ruma ne'ebé prejudika ka previlijia fali lista kandidatura seluk;
2. Individu ka grupu ka Meza tenke asegura tratamentu hanesan no imparcial iha kualker intervesaun tuir prosedimentu eleisaun.

Artigu 33.º

Kriteriu kandidatura

1. Kriteriu kandidatura atu tur iha estrutura APFTL mak:
 - a) Eis-membru Parlamentu Foinsa'e Nian;
 - b) Hanoin diak;
 - c) La involve iha partidu politiku;
 - d) Hakarak no hadomi Alumni Parlamentu Foinsa'e Timór-Leste;
 - e) Prezidente Korpu Ezekutivu bandu eh la bele ka'er knar iha instituisaun seluk (Exeptu KRJ no Korpu Fiskal).
2. Kandidatu ida-idak forma Pakote no hetan apoiantes minimu nain 15;
3. Estrutura Alumni Parlamentu Foinsa'e Timór-Leste sira tenki hela iha Dili;
4. Iha lista kandidatura tenke indika kandidatu sira nia pozisaun.

Artigu 34.º

Regra votasaun

1. Ema ida votu ida, livre, diretu no segredu;
2. Verifika eleitor ka membru sira ne'ebé marka prezensa no iha kapasidade eleitoral;
3. Sekretariu Meza entrega voletin votu ba eleitor sira;

-
4. Vota ba lista no entrega ba kaixa eleisaun nian;
 5. Kada eleitor hetan voletin votu ida deit;
 6. Konsidera nulu wainhira eleitor sira marka ladun klaru.

Artigu 35.º

Apuramentu rezultadu

1. Meza halo kontajen votu iha kongresista nia oin, verifika numeru votante tuir lista ho votu ne'ebé iha;
2. Se numeru votu iha urna laran lahanesan ho numeru votante, vale mak ida primeiru;
3. Presidente Meza proklama lista manan ka votu barak liu iha eleisaun no asina akta.

Artigu 36.º

Direitu reklamasau

1. Kualker lista kandidatu bele reklama ho hakerek ba Meza ho fundamentu iregularidade iha aktu eleitoral no iha momentu halo kontajen votu;
2. Meza bele halo fali kontejen wainhira iha lista kandidatura ruma husu ho faktu sira;
3. Kazu verifikasau iregularidade iha prosesu eleisaun bele hamosu fali eleisaun foun ho desizaun Kongresu maioria simples.

Artigu 37.º

Simu pose no juramentu

1. Estrutura eleitu simu pose husi Presidente Meza perante kongresu;
2. Imposante/estrutura eleitu sira presta juramentu hanesan tuir mai ne'e:
“Hau jura, ba Maromak, ba heroi foinsa'e sira ne'ebé sakrifika-an ba libertasaun patria no ba hau nia onra, ho forsa vontade no espiritu responsabilidade katak hau sei halo tuir lolos knaar ne'ebé hau simu, kumpri no halo tuir estatutu APFTL, fo hau nia kbi'it no kapasidade atu defende no hametin unidade hodi kontribui ba dezenvolvimentu nasional.

KAPITULU IX
FONTES NO GESTAUN FINANSEIRU

Artigu 38.º

Fontes finanseiru

1. Fontes finanseiru Alumni Parlamentu Foinsa'e Timór-Leste mai husi:
 - a) Kontribuisaun husi membru APFTL rasik;
 - b) Doasaun husi estadu Timór-Leste no doadores nasional no internasional;
 - c) Apoio membru organizesaun nian ba program ruma iha rai-laran no rai-liur.

Artigu 39.º

Gestaun finanseiru

1. Gestaun finanseiru Alumni Parlamentu Foinsa'e Timór-Leste nakloke ba verifikasaun no fiskalizaun husi auditor internal no external bainhira prezisa;
2. Finansa mak gere orsamentu Alumni Parlamentu Foinsa'e Timór-Leste;
3. Orsamentu Alumni Parlamentu Foinsa'e Timór-Leste sei utiliza ba programa ne'ebé planeadu.

KAPITULU X
REVIZAUN ESTATUTU

Artigu 40.º

Inisiativa no tempu halo revizaun

1. Estatutu Alumni Parlamentu Foinsa'e Timór-Leste sei halo revizaun iha kongresu ne'ebé realiza iha tinan lima dala ida;
2. Estatutu APFTL sei halo revizaun wainhira hetan proposta husi delegadu sira minimu [2/3] rua baluk tolu husi total delegadu.

Artigu 41.º

Limitasaun ba revizaun

1. Halo revizaun ba artigo balu tenke respeita:
 - a) Naran no data hari'i organizasaun nian iha no. 1 no no. 2 artigu 1.º;
 - b) Organizasaun nia lema iha artigu 6.º;
 - c) Organizasaun nia Simbolu iha artigu 7.º;
 - d) Organizasaun nia Inu iha artigu 8.º;
 - e) Juramentu no. 2 artigu 37.º.

KAPITULU XI

DISPOZISAUN FINAL

Artigu 42.º

Data vigór estatutu

1. Estatutu ne'e tama no vigóra iha loron 26 fulan Agustu tinan 2015;
2. Aprova iha Kongresu, iha 26 fulan Agustu tinan 2015.

Sekretaria

[.....]

Vice-Presidente

[.....]

Prezidente Meza

[.....]